



古序翼

三



1498
9



古序翼卷三



北筑 龜井昱元鳳著



衛淇澳

辨說云此序疑得之

考槃

辨說云此為美賢者窮處而能安其樂之詩文意甚明然詩文未有見棄於君之意則亦不得為刺莊公矣序蓋失之而未有害於義也至於鄭氏遂有誓不忘君之惡誓不過君之朝誓不告君以善之說則其害義又有甚焉於是程子易其訓詁以



為陳其不能忘君之意陳其不得過君之朝陳其
不得告君以善則其意忠厚而和平矣然未知鄭
氏之失生於序文之誤若但直據詩詞則與其君
初不相涉也

翼曰孔叢子仲尼曰吾於考槃見遁世之士而不悶
也乃是詩之義明透不聒而語可矣康成之妄朱子
責之大當矣予故曰呂政之灰六籍諸子之災也朱
子之滅古序毛鄭之罪也程子所以填補鄭箋之闕
意乃駕而其強文自若遠不及集傳之穩矣問者曰
柳序刺莊公者非與曰奚為其非矣文王明夷仲尼

旅人其君可知舉一隅而不盡物詩之體也所謂碩
人邦之紀民之主也不在本朝而在澗阿失其所也
不語政道而獨歌非其常也井渫不食為我心惻王
明並受其福當莊公之時賢才舊有位之人退而鄙
在側陋故賦其行遜忘世之志以使莊公知夫人而
有此態也古序之於詩大義皆是何至是詩而疑之
乎然則仲尼所見乃奚若曰遜世無悶是詩所賦之
辭也而刺莊公者是詩所以賦之志也夫子之言不
及焉爾子曰於木瓜見苞苴之礼行也是亦唯就木
瓜桃李而言爾又嘗引鄭詩曰執轡如組兩驂如舞

作是詩者其知政乎。是亦唯細繹尋流之言。而鄭詩未始有與政闕也。古人之取詩不編不構立言之雅甚遠矣。

碩人

辨說云此序據春秋傳得之

翼曰閔而憂之碩人之所以賦也。而非其所賦也是詩左氏之徵明矣。其可以知詩之體焉。然則考槃之美隱者亦獨無有所以美之乎。詩泯千有餘歲其體與事不可得而知也。微序我其長夜乎。何則易書三禮其義雖微皆可以辭通焉。唯詩不可以徵于辭。若

碩人之閔莊姜清人之刺文公其覈者也。他若以雍徹射節采蘩采蘋饗歌清廟亦不可以辭論其用者也。若以辭而已序之廢于宋也晚矣。朱子武斷專以辭而已蔽其用與事體。故其說果敢徵之古書而窒矣。

氓

辨說云此非刺詩宣公未有考故序其事以下亦非是其曰美反正者尤無理

翼曰此非刺詩者朱子之所以為詩與古異故也。宣公未有考者朱子以其說之主臆以古人為臆其說

故也。序其事以風者，所謂國史吟咏情性也。美及正者，亦刺中之美也。非贊揚嘉譽之謂也。彼善乎是之謂也。凡古序之立論闡義，疏暢柔腴而特至者，大非後人之訣厲嶮刻論義相軋之疇也。古序譬則禮樂君子也。後人譬則刑名法術也。故以後人談古序而逸郢書燕說之誚，幾希矣。且是序也，其文詳表玄感，人心信而誦之，實古君子之聲氣也。若以氓為棄婦，實作之乃全然無美，反正之義，又無刺淫佚之理，隨文而解之，乃可。若以為詩人序其事以風，為孤神旁通流形無垠，正與采薇出車四牡皇華合體比義，序

於是乎端確足以燭大旨矣。夫采薇者，文王之所以遣戍役也。而為戍役者之言，以慰其心。氓者，君子之所以刺淫佚也。而為淫佚者之言，以寫其態。采薇首章曰：靡室靡家，玁狁之故。戒之以國家之難也。二章曰：我戍未定，靡使歸聘。厲之以公私之分也。三章曰：王事靡盬，不遑啓處。教之以勤王之節也。四章曰：豈敢定居，一月三捷。風之以功伐之威也。五章曰：四牡翼翼，象弭魚服。要之以罷命之任也。卒章曰：我心傷悲，莫知我哀。慰之以行役之勞也。以是觀之，通篇雖戍役自稱其勤苦之詞，其意所寓實文王策勵之者。

而不翅其賢勞之閔已。翦々然如海霧之罩初日。雖
不辨曜華所在。融然之光。決然之明。天下莫不仰焉。
此文王之所以致將士之說。又能訓成之也。故善為
采薇諸篇。則是詩之義。如破竹。迎刃而裂矣。微序我
何以觀之乎哉。嘗試論之。是詩之首。序淫夫之情。必
若可信之事。次章序迷不信之情。祇自戀傷之事。其
次章序色衰身廢。悔恨必及之事。又其次章序淫夫
不賴。女雖貞且勤。亦必不終之事。又次之序。怨對雖
甚。必歸自悼之事。卒章序淫夫姦詐棄而始悟。至是
必深嘆悟不蚤之事。以是觀之。通篇雖棄婦自悔之

辭。其意所寓。實詩人感發時女者。而不翅其一婦之
刺已。乃所謂美反正者。于嗟女兮。無與士耽。女之耽
兮。不可說也。皆於舊日之惡。深自悔艾。其言之不啻
如自其口出。故詩人特排列此句。以勸改厲之美也。
此君子所以作是詩。以沮勸人也。或曰。夫逃嫁之女。
秦政且猶戮之。君子而有美焉。子曰。淫為大罰。女而
淫。斯匪人也。尚何美。雖然。淫風之行。人皆其人也。故
叔世鄙夫。不可引繩墨正之久矣。予近出國治。而寓
于西鄙。其寒細之有室家者。鮮非踰牆而從之。既從
之。又不安其室。以烏龜其夫。土俗習以為常。父母亦

不必問其或稱靜女者亦自桑中洧外來而不說初耳然而父老所稱譽之亦以其今之好而不以昔之醜今以平章至治之世僻陋之民或然况衛教世淫放喪止將及則民間之亂殆有不可道必矣當此其世而等此其人有女卑遜克自抑損則雖不善於始不猶愈身為虔婆以老淫佚為者乎此詩人所以美于改也我聞之君子之治己也嚴而不自恕其於人也以人論人故易為人矣况衰世不教之民將為責之正道為乎又美其人之可美者而已是詩之所以為詩本篇論之詳矣人皆知衛之有氓猶邶之有谷

風而無論其體與事之所殊惟小序蚤已發之大義宜乎小序之傳自先漢以來未有之不尊也朱子視之如齊東野人之語故求之解若是其淺論之義若是其麗嗚呼夫夫過矣

○竹竿

辨說云未見不見答之意

翼曰巧笑之瑳可以見其不見答也若朱子解巧笑不成義夫三衛一也故是序與泉水序互相發明合而見之古人之意彰矣泉水稱父母終竹竿稱不見答互發也既為人婦而父母亦既終於是懷舊土者

其處逆境可推而知之。我故曰：泉水之女亦不見答者也。歎父母存有歸寧之義，子而思親，可以禮寧，何必忍之。我故曰：竹竿之女亦喪父母者，歎序明哉。密矣。

○花蘭

辨說云：此詩不可考，故闕。

翼曰：從古序義甚分了。將為用闕。左氏曰：惠公之即位也少，可證曰：大夫刺之最明雋矣。朱子奚不曰：淫婦戲謔之詩乎。廢序詩之可疑甚多。立臆詩無不可。解朱子既廢序，又以立臆獨闕是詩如何如何。

○河廣

○伯兮

辨說云：舊說以詩有為王前駢之父，遂以此為春秋所書。從王伐鄭之事，然詩又言自伯之東，則鄭在衛西，不得北行矣。序言為王前駢，蓋用詩文為然，似未識其文意也。言當作曰

翼曰：舊說之善否不必辨矣。為王前駢，摘詩成文，朱子謂之不識文意，甚乎其機序也。欲片言隻字必穿求洗索而斥之，我察其辭，蓋亦陷之淫也夫。

○有狐

辨說云男女失時之句未安其曰殺禮多昏者周禮大司徒以荒政十有二聚萬民十日多昏者是也序者之意蓋曰衛於此時不能舉此之政耳然亦非詩之正意也長樂劉氏曰夫婦之禮雖不可不謹於其始然民有細微貧弱者或困於凶荒必待禮而後昏則男女之失時者多無室家之養聖人傷之寧邦典之或違而不忍失其婚嫁之時也故有荒政多婚之禮所以使之相依以為生而又以育人民也詩不云乎愷悌君子民之父母苟無覆育兆民之王其能若此哉此則周禮之意也

翼曰男子三十而無室女子二十而無夫鰥寡之民憔悴虐政不能保其室家之好此所謂失時喪妃也古仁聖又重人情也建凶荒多婚之政以鎮風俗以禁淫慝以育人民也今衛用亂之故民卒流止使男女怨曠失時無所告愬吁不亦甚乎故引古禮以責之也非專責衛不能舉此禮不然文粗而義迂於詩有何相闔又有何發揮正義之誤可知朱子與正義塗々附序不如是麤也或曰子貢傳國亂民貧君子傷之賦有狐子曰見惻隱之仁焉如何予曰夫子之語未知所出且惻隱之仁據孟子而造語已矣

○木瓜

辨說云說見本篇

翼曰朱子云男女相贈答之詞。襲積腐套不足辨矣。朱子嘗云詩錄木瓜即春秋序績之意亦以善衛人之情也。豈以齊桓之事盡可法哉。朱子初見如是。雖猶從序說。若有不憚於心然。以孟子論齊桓也。安成劉氏曰桓公封衛以王法律之。因為春秋之罪人。自衛人視之。則天地再造之恩也。果如序說。則桓公之德僅可比于草木之實。而衛人之報者。自擬以重宝。尚為知恩也哉。序說非詩意。是大不解詩。以公廢之。

口吠朱子之聲者也。詩義蘓子由盡之矣。岡生云孔子曰于木瓜見苞苴之禮行焉。何輒可以淫詩目子。又左傳晉韓宣子聘于衛。侯享之北宮文子賦淇澳。宣子賦木瓜。思報德也。如其淫詩。宣子必不謫于衛矣。此論於序合矣。於理正矣。序稱衛之敗。凡三定之。方中曰衛為狄所滅。載馳曰衛懿公為狄人所滅。木瓜曰衛國有狄人之敗。定之方中曰野處漕邑。載馳曰露於漕邑。木瓜曰出處于漕。文變虎炳。實古文之體也。序之轄字銓句。縝密不苟。故特表之以抽其緒。或者其以是繹思之乎。

○王黍離

○君子于役

辨說云此國人行役而室家念之之辭序說誤矣其曰刺平王亦未有考

翼曰詩之君子有稱賢士大夫者有室家之稱其夫者如是詩未知其孰賢要之皆通已序之君子直舉詩辭以行釋于也岡生云齊襄葵丘之成瓜時而遣及瓜弗代而無知之禍因是丈夫思其危難良有以哉此足以發序意

○君子陽

辨說云說同上篇

翼曰朱子雖剔去是序而不能無繼續慶源輔氏深回護朱子而不能從朱子於斯序之負明可知矣

○揚之水

○中谷有蓷

○兔爰

辨說云君子不樂其生一句得之餘皆衍說其指桓王蓋據春秋傳鄭伯不朝王以諸侯伐鄭伯禦之王卒大敗祝聃射王中肩之事然未有以見此詩之為是而作也

翼曰朱子疑序者也疑者不可以為序焉爾

○葛藟

辨說云序說未有據詩意亦不類說已見本篇

翼曰朱子謂序說未有據者疑為故也謂詩意不類者詠古人也無乃據毛鄭不明之說以濫黜小序乎集傳以是為興何其黜芴無味朱子以為興詩類乎且是詩非興也左傳樂豫曰公族公室之枝葉也若去之則本根無所庇廕矣葛藟猶能庇其本根故君子以為比矣况國君乎所謂君子乃王族是也古人之言可不彈思乎

○采芣

辨說云此淫奔之詩其篇與大車相屬其事與采唐采芣采葍相似其詞與鄭子衿正同序說誤矣翼曰朱子之為詩淫奔猥褻津一衝口古之人未嘗有也詩傳亦以是為大夫憂讒之詩若以篇與大車相屬為證又與葛藟相連則此離之人思其親暱云爾亦可夫序者堂之階也室之戶也朱子擊而毀之倒行逆施于實于墻惟意所之不謂已誤而嫁諸古人妄矣

○大車

辨說云。非刺大夫之詩。乃畏大夫之詩。

翼曰。朱子之說是。則杖杜。室家思士之詩。非還役之勞。四牡使臣自傷之詩。非使臣之勞。彼以其列於正雅。故率古序而不敢很。何其說之頗類。一彼一此。舌如轆轤。不免臆揣。無稽而已。古詩自有古詩之體。而古人實能知之。近者門下有一新進。問曰。詩不徵于辭。將何據。陳古之說。我不敢信。予曰。此詩之體也。將謂采薇。杖杜。何生曰。據于序。說則梗于辭矣。求辭之穩。惡用序。予曰。如碩人。清人。何生。意富而未服。居數日。同舍有歸省其父者。生作別詩。乞覽。起句曰。酌我

千鍾酒。送君萬里行。予直叱曰。汝寒士。千鍾送人。不以泰乎。且相去千里而近。何謂萬矣。因又誦之曰。汝詩。妄言。畫樓言樓。畫閣言閣。瑤琴也。銀燭也。驪歌也。行馬也。皆虛構捏造。欺罔莫大焉。以朱一筆橫抹之。生忿然曰。詩不若是拘束矣。李白一斗詩百篇。何必飲一斗而詩必百篇。予曰。噫。不徵于辭。將何據。白髮三千丈。真是太白之髮。似個其長也。生色然曰。小子過矣。請少進。予曰。近體之為體如此。則風雅之為體。不亦如彼乎。若近體泯數百年。而後辭人誦近體詩。有貂裘鹿車。則謂其人實披裘駕車。有龍劍鶻冠。則

謂其人實帶劍加冠。有塞下曲少年行。則實謂其人
軍士也。遊冶也。有遊仙曲春宮怨。則實謂其人仙子
也。宮女也。其謂之通論乎。將謂之不通之論乎。間或
有傳者而示近體之為體。亦忿然不可曰。不徵于辭。
將何據。豈不亦不通之尤者乎。且朱子以大車為與
大夫而嫌王卿士無此明德。故曰大夫猶有能以刑
政治其私邑者。豈不亦臆中之臆乎。詩在變風而頗
嫌同二南之正。故曰去二南之化則遠矣。豈不亦窮
中之窮乎。且解異穴同穴。奄歛舛錯。妄言戾古。又何
以知序所謂禮義陵遲者乎。輔廣曰。漢廣野有死麕。

之女。端莊貞潔。二南之化也。豈至於有淫奔之心。待
有所畏而後不敢哉。此又鋪張朱子者論析牛毛。言
入秒芴。我未之前聞也。子夏子騫喪畢而見于夫子。
援琴而絃。子復樂而子騫哀。夫子皆君子稱之。聖人
之道於是乎見。夫大車賦以禮制心之道。以風時政。
故其辭曠。二南異已。嗚呼。雖二南之時。處子十五。誰
無懷春之情。上聖有禮。俾人無訖。是尋倫之所以叙
也。果如補氏之言。使天下蚩々之女。皆成古佛菩薩
之德者也。果然。天官之人何掌。媒氏之禁。遷葬嫁場。
聽陰訟于勝國之社。亦尸位而已歟。

○丘中有麻

辨說云此亦淫奔者之詞其篇上屬大車而語意不莊非望賢之意序亦誤矣

翼曰淫奔朱子曰癖語意不莊朱子疑門一闕無見非竊鈎也古曰五心六意歧道多怪執己私臆驚然若陟古人溫之君子一何恤也詩傳亦曰留子賢而退隱周人慕之賦丘中罔生補義引詩弋曰大車禮義陵遲而人思政丘中有麻賢人放逐而人思賢猶有先王之遺風焉故叙詩以此終王風朱熹易幽人之貞為姦私之事吁子嗟子國之子何其一婦人而

夫之多也

○鄭緇衣

辨說云此未有據今姑從之

翼曰無據而苟從不如闕疑之明也信信信也疑疑亦信也今不疑其疑而信之是不信其信而疑之也顛沛逆曳莫甚焉昔我友嘗論之曰以朱子之見觀之此詩亦連將仲子其心欲為男女慕悅之詩甚矣唯以禮記孔叢明載仲尼之言不得已而從古序也此言極當呂氏春秋宋有澄子者止緇衣求之塗見婦人衣緇衣援而弗舍欲取其衣曰今者我止緇衣

婦人曰公雖止緇衣此實吾所自為也澄子曰子不
如速與我衣昔我所止者紡緇也今子之衣禫緇也
以禫緇當紡緇子豈不得哉以是觀之益知論者之
言不欺也古序曰國人宜之明緇衣之作于鄭也今
朱子乃云周人愛之故作是詩嗚呼周人之詩而列
于鄭抑何由雖一字之微其義所繫純明駭晦君子
不無褒貶焉

○將仲子

辨說云事見春秋傳然莆田鄭氏曰此實淫奔之
詩無與於莊公叔段之事序蓋失之而說者從而

巧為之說以實其事誤益甚矣今從其說

翼曰朱子據鄭聲淫擗鄭風為淫奔之詩甚乎其惑
臆捏之妄至此尚古矣哉古士大夫非先王之法言
不敢道邪淫之辭不發於口禮樂之道也今據朱傳
以君子刺淫為淫者自作咸距違舊聞淫以為解擗
其人則喪心奪魄之頑也誦其事則鑽隙踰牆之實
也稱其言則口澤污蟻歌其風則淫聲流辟天下之
猥鄙醜惡集成藪澤昔甯母之盟鄭太子華犯鄭伯
之命以來管敬仲諫齊侯曰君以信與禮屬諸侯而
以姦終之無乃不可乎夫諸侯之會其德刑禮義與

國不記記姦之位。君盟誓矣。桓公以是辭之。夫樂正
四術盛德之事也。而以淫者之言問之。其為德之賊
不亦甚於子華子仲尼亦何所取而編諸周召雅頌
中。使三千束脩士夙夜諷誦焉。曰興於詩。無乃以放
洩鼓舞人心也乎。何教之為。乃後世有獻議乞經筵
不以國風進者。亦不為非忠臣之志也。斯義之赫然
顯明者。學者有何疑滯而戴於千載不刊之序乎。雖
然。毛鄭以後無明者。隲古義則序之天闕。何唯學者
是取。或問桑中溱洧不亦汚且辟乎。曰否。以古義觀
之。此忠臣所以諫上也。其辭之淫褻潰亂者。以著風

之衰民之瘼也。不如是無以明邦政不振而震驚民
主故也。是以擬其人則君子抱世道之憂者也。察其
事則大人格君之非心者也。論其言則民俗之實錄
也。律其風則方土之正音也。夫然故列于雅頌而無
慙德焉。施之青衿始學者而無淫猷焉。尚矣哉序乎
或問。朱子云。鄭若舉一篇二篇。則人以為偶然。故咸
舉以旌其俗如何。曰。導哉詩。小子遊倅朝夕風誦之
詞也。勸百而諷一。鄭志之為子虛上林。不愈甚乎。罔
生曰。鄭樵曰。此詩為淫女之詞。朱熹仍之。按左傳。襄
二十六年。子展相鄭伯如晉。賦將仲子兮。叔向稱其

矣
儉而壹如其淫詩也子展豈以鄭人揚鄭醜叔向亦
何取而卜其後也其不然明矣固生可謂尚序矣而
序之所以釋詩詩之所以刺上說者殊潰久或問鄭
醜之不可揚也序所謂刺莊公者獨非國惡乎曰風
刺之詩無害播於諸侯觀於春秋士大夫可知矣

○叔于田

辨說云國人之心戴於叔而歌其田狩適野之事
初非以刺莊公亦非說其出於田而後歸之也或
曰段以國君貴弟受封大邑有人民兵甲之衆不
得出居閭巷下雜民伍此詩恐亦民間男女相說

之詞耳

翼曰非刺莊公者朱子以其說為說也非悅其田而
歸之者古序之言然或說拙滯不知乎詩又不知于
物態男女相說之詞朱子真面目也夫夫既或治之
予何言哉

○大叔于田

辨說云此詩與上篇意同非刺莊公也下兩句得
之

翼曰莊周有言繫尾結繩窳句遊心於堅白同異之
間朱子論國風之謂也歟何則古人所為刺詩朱子

乃斷之以辭。異見相軋。而無古籍明徵可質。徒吮聒以張簸。獨志將何所底止乎。說出于己者。是之出于古者。非之。得非人欲之私哉。如必斷之以辭。碩人清人。四牡皇華。皆斷之於辭。而可。彼以其明徵存于古籍。不能以辭取斷。而他必斷于辭。私臆橫絕。飛言如雨。我未之敢信也。且朱子既以叔于田為民間男女相說之詞。則大叔于田。又何不曰士大夫姬姜相悅之詞乎。言不質於古。而抽諸肺腸。決撒放言。雞三足。白狗黑。黃馬驪牛。三嗟亦何紛紛。若擊鼓而求止。子邪。毋使漆園之人。獨笑於無何有之鄉焉。講聖藉者矣。

○清人

辨說云。按此序。蓋本春秋傳。而以他說廣之。未詳所據。孔氏正義。又據序文。而以是詩為公子素之作。然則進之當作之。進今文誤也。原稱某公。翼曰。是序比左氏文殊。續詳所謂公子素。亦它書所

不載則古來傳說無疑焉。朱子以序稱某公某時為妄，不斲則銘無復遺孽，唯其姜與公子素之無非也。蓋以其言明確不汗欺，進之退之文如貫虹，不可乙也。古文如期者多，若乙之文遂不成文。古之文文而胎文，是以沈遠矣。子思曰：書之意兼復深奧，訓詁成義。古人所以為典雅也。豈繫書古之文皆然，况小序文最高潔而淳備，人疾不求焉耳。

○羔裘

辨說曰：序以變風不應有美，故以是為言古以刺。今之詩，今詳詩意，恐未必然。且當時鄭之大夫如

子皮子產之徒，豈無可以當此詩者，但今不可考耳。

翼曰：變風多美詩，序豈為是乎？陳古朱子所不取其疑之也，宜矣。然其說至楚茨諸篇及魚藻采菽而窮矣。故解變雅以太平熙皞之風，而編簡差錯。夫子所訂紛如，荀卿之言曰：小雅今而思往，乃為楚茨諸疾篇及魚藻采菽之也。荀卿周季大儒，其言小雅止興古序，損箴朱子雖宏辨，又將焉興古人，確其說乎？學者察之，其唯敬遵古序，則夫子之訂可信。荀卿之言可徵，我是以信陳古之為古傳，不敢猜焉。左傳昭

公十六年。子產為韓宣子賦鄭之雝裘。則朱子所謂子皮子產者。雖曰假設亦踈妄也。是妄是踈。以韓非古義。君子蓋哂之矣。呂覽以褻裳為子產作。而左子子大叔為韓宣子賦褻裳。則呂覽朱子同妄矣。知雜說之妄。而觀古序之邵焉。

○尊大路

辨說云。此亦淫亂之詩。序說誤矣。

翼曰。康成之說迂甚。序之否褻抑有由也。然鄭則不明而廢古序。其適論乎。岡生曰。朱熹以此詩為淫婦之詞。引宋玉好色賦為證。夫宋玉稱詩。正竊用其語。

耳。文人用詩語率如是。何反以此詩為宋賦註脚乎。

○女曰鷄鳴

辨說云。此亦未有以見其陳古刺今之意。

翼曰。朱子于雞鳴乃曰序得之于此序。乃曰序失之一簧兩舌矣哉。且是詩也。雖周南召南未至。如是其美也。况變風乎。室家之好。德行之嘉。十五國風第一流也。我敬古人。是以信之。不說德之言。昌明莫尚焉。匡衡所謂篤於行而蕪於色者。又何以加諸。輔廣曰。詩詞正是說德而不昵于色。序者意鄭國之風不宜有此。故強以為陳古義以刺今。其思窄狹固滯甚矣。

鄭風雖曰淫亂而天理民彝豈容珍滅哉唯其鄭風而有此詩此聖人所以錄之也陳哉寔言乎雖微鄭風盍錄諸乎以輔廣持論則淫女醜夫之詩猶且錄之而可謂鄭而有之故聖人錄焉乎輔廣無乃以臆見誣聖人乎朱子雖疑是序乃未敢為當時實有之故曰此詩人述賢夫婦相警戒之詞而輔廣乃高呶大呵敢以窄狹固滯稱之汰哉且必偪束其辭必無陳古刺今者其果不窄不狹不固不滯也與古序則不然或辭約而意汎或外笑而內刺或誦古而風今或譽臣而譏君或舒而厲或一而萬變化不窮如天

飛之龍不可捉索如橫海之虹其果窄乎狹乎將因滯乎以春秋之義論之以璧假許田會于稷以平宋亂天王狩于河陽趙盾弑其君亦皆不可以許通者也若夫序者意鄭不宜有是故為陳古義云爾者輔氏之陰許妄鑿以收度古人之心已

○有女同車

辨說云按春秋傳齊侯欲以文姜妻鄭太子忽忽辭人問其故忽曰人各有耦齊大非吾耦也詩曰自求多福在我而已大國何為其後北戎侵齊鄭伯使忽帥師救之敗戎師齊侯又請妻之忽曰無

事於齊。吾猶不敢。今以君命奔齊之急，而受室以歸，是以師昏也。民其謂我何？遂辭諸鄭伯。祭仲謂忽曰：君多內寵，子無大援，將不立。忽又不聽。及即位，遂為祭仲所逐。此序文所據以為說者也。然以今考之，此詩未必為忽而作。序者但見孟姜二字，遂指以為齊女而附之於忽耳。假如其說，則忽之辭昏未為不正而可刺。至其失國，則又特以勢孤援寡不能自定，亦未有可刺之罪也。序乃以為國人作詩以刺之，其亦誤矣。後之讀者又襲其誤，必欲鍛鍊羅織，文到其罪而不肯赦，徒欲以徇說詩

者之謬，而不知其失是非之正，害義理之公。以亂聖賢之本指，而壞學者之心術，故予不可以不辨。翼曰：或問君必稱謚禮也。昭公之名，何居？曰：子學春秋。平。桓公十有一年。秋七月，葬鄭莊公。鄭忽出奔衛。十有五年。五月，鄭伯突入于櫟，以是觀之。忽春秋之所不君。秋九月，鄭伯突入于櫟，以是觀之。忽春秋之所不君焉者也。隱公四年戊申，衛州吁弑其君完。九月，衛人殺州吁于濮。州吁之不稱君，例亦猶忽也。是以古人序邠曰：怨州吁也。而鄭風則曰：刺忽也。文法義例與春秋比其嚴，斯可以知古人立言之道也。今未達古

人之志以卒采之辯敢詢厲古文是未窺九淵而嘲
驪龍于畫圖也故義不可不究舌不可不捫杜預曰
鄭忽之出奔也莊公既葬不稱爵者鄭人賤之以名
赴且忽守介節以失大援從匹夫之仁忘社稷之計
故君子謂之善自為謀言不能謀國也父卒而不能
自居鄭人亦不居之始於見逐終於見殺三公子更
立亂鄭國者實忽之罪也固有焉胡知國曰鄭忽之
出奔而名不能居也歸而獨稱世子則止其居位明
矣考於詩有女同車刺無大國之助也山有扶藪所
美非美然也釋兮君弱臣強不倡而和也狡童不能

與賢臣圖事權臣擅命也夫以狡童目其君聖人猶
錄其詩所以見忽之失國亦其自取非獨仲之罪矣
夫康侯之言顛頗參於詩其於春秋義例罪忽也深
矣凡二子之所以論春秋我未識其孰獲聖人之旨
也而其言忽之罪同矣乃先哲之傳序說於聖人褒
貶之道如合瑞節矣尊猶不足而敢猜焉朱子曰序
者但見孟姜生說此妄許已德音不忘豈淫者聲氣
乎凡以臆度人又從而詆焉不恭甚大壞學者心術
又曰忽未有可刺之罪後人乃欲文致其罪而不肯
赦此僻見已春秋之義元凱康侯之論亦可徵矣程

子亦論春秋云。忽不能保其位。故不爵。鄭人謂之狡童。又曰。狂童恣行。其不肖可知。是非之正義理之公。惡在。舉鄭風。盡附之。淫褻口臭。果聖經之本指乎。夫事不徵古而決于心。大言自得。私壑斷於儒林者。我不知且。所謂心學者。程子其頗優矣。忽若無罪而也。為有罪。壞天下之心術者。程子也。朱子是則不亦戾乎。岡生曰。齊之欲妻者。文姜也。向使忽昏于齊。縱能免於見逐。亦何能逭彭生之禍。此妄說已。序曰。太子忽嘗有功于齊。言敗北戎也。北戎之役。在桓公六年。文姜既已胎子。同數月矣。岡生信序者也。而猶踈漏如是。序果深哉。正義之論可觀。

○山有扶藪

辨說云。此下四詩及揚之水。皆男女戲謔之辭。序之者不得其說。而例以為刺忽。殊無情理。翼曰。朱子之詆古人。不亦甚乎。已則無替。排人以逞。我不知其說已。雖然說者或以鄭風刺忽之詩多。故鄭唯忽為最不肖。此惑說已。幽厲之雅。僖公之頌。可。以大觀焉。岡生曰。朱熹以為淫女戲其所私者。淺陋甚矣。予亦不勝其實醜實穢。咄嗟古聖人濯之。江漢。暴之秋陽者。而污之牛屎泥中者。此何人哉。

○釋兮

辨說云見上

翼曰左傳昭公十六年晉韓宣子聘于鄭六卿餞之於郊宣子曰二三君子請皆賦起亦以知鄭志子蠶賦野有蔓草子產賦鄭之雋裘子大叔賦褰裳子游賦風雨子旗賦有女同車子柳賦釋兮鄭志即鄭風是也以朱說言之除羔裘之五詩皆淫者褻詞韓起欲知鄭詩而請賦焉而五大夫皆歌褻詞以為賓榮以播國醜豈不大以淫駭霸國正卿平何楷云不知朱喜何意必欲改為淫女之詞夫女雖善淫不應呼

叔兮又呼伯兮殆非人理言之污人齒頰矣予亦不勝其汚甚趙衰曰詩書義之府也古之義豈如是醜醜乎

○狡童

辨說云昭公嘗為鄭國之君而不幸失國非有大惡使其民疾之如寇讎也况方刺其不能與賢人圖事權臣擅命則是公猶在位也豈可忘其君臣之分而遽以狡童目之邪且昭公之為人柔懦踈闊不可謂狡即位之時年已壯大不可謂童以是名之殊不相似而序於山有扶藪所謂狡童者方

指昭公之所美。至於此篇，則遂移以指公之身為。則其舛又甚，而非詩之本旨明矣。大抵序者之於鄭詩，凡不得其說者，則舉以歸之於忽。文義一失，而其害於義理，有不可勝言者。一則使昭公無辜，而破謗。二則使詩人脫其淫譎之實罪，而麗於訕。上悖理之虛惡。三則厚誣聖人刪述之意，以為實。賤昭公之守正，而深與詩人之無禮於其君。凡此皆非小失，而後之說者，猶或主之。其論愈精，其害愈甚。學者不可以不察也。

翼曰：狡童斥蔡仲，序所謂權臣是也。不然，擅命一句贅矣。褻裳之狂童，恣行亦仲也。曰擅曰恣，皆仲真贅。左氏所謂祭仲專是也。凡序之刺忽云爾者，皆無不憤仲古人之言遠，勿以適言視之。其或得焉。嚴粲云：仲已老矣，不應為童。此膠論已。史記有箕子之歌曰：麥秀漸兮，禾黍油兮。彼狡童兮，不暵我好兮。所謂狡童者，紂也。紂已抱子，不害稱童。且非童而曰童，是故詩可以怨，可以刺。仲尼曰：小辨破義，為詩癸也。朱子不探古序之蹟，蒙于說者之妄，敢鳴鼓以責。無乃爾是過與？朱子曰：使昭公無辜而破謗，一害也。夫忽春秋所貶，何故無辜？又曰：使詩人遁其實罪而麗虛。

惡二害也。夫實罪虛惡，皆朱子臆造。已造諸其臆，又從攻之，猶戟其手而拊其膺，急則自戕，何傷乎序矣。又曰：誣聖人以賤昭公，守正與詩人無禮，三害也。夫忽之守正，言不昏于齊，歟是於諸詩何與？不昏果正與先儒之言，亦可懷也。詩人無禮，朱子受毛鄭之謬，以誣古人也。嗚呼！朱子負博達之才，馳痛快之辨，而無損挹卑讓之意。于詩大義，自以為天下古今唯我獨知乎？何其惑矣！凡惑者之言，非蔽之說，則陷之謠也。學者不可不知言。子貢傳有麥秀無稼童，蓋史記所載四句，弁是詩乎。

○褻裳

辨說云：此序之失，蓋本於子大叔韓宣子之言，而不察其斷章取義之意耳。

翼曰：朱子之於鄭詩，不為醜聲，則不惜矣。古之所無，而宋始有焉，其可以為定說乎？高叟謂小弁，小人之詩。孟子猶且論而廓之，况醜男子穢女子而列于周樂，吾敢信之乎？雖不能廓，敢不論焉。子貢傳曰：子良去國，不忘諫君，賦褻裳。罔生曰：忠臣憂國之苦心，反墮媒穢之昵情，吁，冤矣哉！歐陽修非序曰：以難告人，豈待其思而後往告，此不深考耳。予曰：永叔未味是

詩之腴也矣

○丰

辨說云此淫奔之詩序說誤矣

翼曰鈞是淫風也古義則正新說則褻觀夫褻與正而崇庠見矣岡生曰豈有奔其人而具礼服以待車馬者乎且堂上非所私之地叔兮伯兮何所私之衆哉

○東門之墀

辨說云此序得之

翼曰朱子離薛明暢流媚大異毛鄭扞戾之說唯其

怡古序大義遂乖雖善無徵無徵不信無亦是察乎可憾如是詩毛鄭殊黠朱子殊哲

○風雨

辨說云序意甚美然考詩之詞輕佻狎暱非思賢之意也

翼曰詩之詞正與菁莪隄桑同何輕佻狎暱之有朱說鄙俚溷辱嘉言雖非經筵其可以講慘哉風雅之汚極矣予不能不為之一痛哭矣

○子衿

辨說云疑同上篇蓋其詞意儂薄施之學校尤不

相似也。

翼曰豈唯詩哉。山川之勝。雲月之色。愁而見之則愀。如樂而見之則躍。如故朱子之以是為儂薄者。亦其心之所惑也。其實詩之辭。不如是黏滯。語曰。心多恨。悔出門見怪。非有怪也。氣燄而已。岡生曰。朱熹雖以。淫奔目之。其作白鹿洞賦。曰。廣青衿之疑門。則仍序說。其識見不定如此。此激辭已。朱子去序。晚年定見也。不可以無特操。罵之。古今其識見之負固者。朱子專之矣。岡生之徒。不得雁行而進。

揚之水

辨說云。此男女要結之詞。序說誤矣。

翼曰。說如朱子。何詩不淫。抑不識必淫而後憚。何居宋儒悅其說者。乃曰。發明放鄭聲之旨。而放而不放。予也。惑之。宋儒又曰。禁聲于樂法也。立辭于詩戒也。而有辭而聲從之。退而不能遠。予也。惑之。岡生曰。朱熹改為淫詩。而于兄弟二字難解。且首句當作何解。可謂善詰矣。正義曰。作詩之時。忽實未死。卒以無大國之助。至於見逐。意亦同。解古序如是。可與入道矣。

出其東門

辨說云。五爭事見春秋傳。然非此之謂也。此乃惡。

淫奔者之詞序誤。

翼曰。朱子所以立說殊矣。通則通。而此諸古序盡衰。世人情遠不及矣。公子五爭。兵革不息。言淫亂之源也。男女相棄。言淫風之行也。民人思保其室家。乃衰世之意也。毋以毛鄭議古序。輔廣曰。夫子錄之以見人性之本善。汗而阿性善。孟子之說已。

○野有蔓草

辨說云。東萊呂氏曰。君之澤不下流。迺講師見零露之語。從而附益之。

翼曰。君之澤不下流。言民之所以窮也。說者或引以解詩。故東萊有是說。未知必然。首句思遇時。言思遇嘉時也。嘉時乃新知樂也。下所廣說。思也。遇也。時也。皆依違而論之。大義不乖。殆乎肖夫子易翼矣。朱子嘗云。許多鄭風。只是孔子一言斷了。曰。鄭聲淫。因又以為是為淫詩。然是詩特叙其情。而無媒黷之辭。髣髴標梅之遺音。所以不為淫詩也。荀子曰。國風之好色也。傳曰。盈其欲而不愆其止。其誠可比於金石。其聲可內於宗廟。此之謂也。若以聲論詩。決。大風表海之美。于齊詩有何交涉乎。且鄭聲之淫。亦猶聲淫及商之淫。故古曰。煩手淫聲。豈專色荒之謂乎。昔孔子

遇程子也。誦是詩以命子路使其贈束帛。若其淫聲
褻辭乎。夫子而稱之弟子者。戾矣。若其獨以辭示戒
乎。夫子亘存焉而不諷誦也。何故。放其聲而歌其辭
乎。天地無此理。不寧唯是。延州來季子聞歌鄭。嗟嘆
而贊其聲之美。特以其細甚也。非之。未曾及所謂淫
者。可見國史之選。夫子之傳。非嘲嚙煩淫之曲也。夫
尚論古書者。而不替于古。徒深獨守而嘔射覆臆。拱
鉤之術。雖多又何為邪。學者其陶心煅意。茲率古人
之義。勿惑于莠于鄭。于利口于鄉原。庶矣。

○溱洧

辨說云。鄭俗淫亂。乃其風聲氣習。流傳已久。不為
兵革不息。男女相棄而後然也。

翼曰。硬哉。朱子之古乎。鄭風之淫。雖自習俗。上有綱
紀。則可以遏。可以移。可以之善焉。何習之有。今兵亂
荐臻。君澤不流。潰然無復。尋倫之文。則淫放之行。不
亦甚焉乎。若夫長國家而不恤世憂之本。委之風習
而無己責。聖人之憂殆乎。仄矣。夫膏梁之性難正。久
矣。茲將藉口朱子。以掩其不肖。其何以堪之。昔人之
言渾厚而教存焉。不獨虛喝其理。驚辨赫人而已。脩
辭之道。泯而立誠之義。苦矣。密察之。知勝而寬裕之。

仁微矣。生今之世而頌論古，無亦是信以為本循而
議擬之乎。而未及究其旨，乃包禍心以臨之，不恭甚
矣。恭者，民之主也。教之先也。故學道者，將恭以處身
而蔑之，若之何其可。人亦誰信之。人所不信，聒以告
人，謂之贅言。贅言，不如其已也。孟子曰：人倫明於上，
小民親於下。其在于今日，尋干戈以爭者，非公子乎。
公子非兄弟乎。兄弟非骨肉乎。骨肉而白刃相屠，上
之不倫，小民其親也哉。故曰：兵革不息，男女相棄，人
之有道也。不念其親親之義，急難相棄，夫婦衰哉。禮
不云乎：夫婦之道，苦而淫，辟之罪多矣。故曰：男女相

棄，淫風大行。夫居防也，庶人水也。防決而水從之，雖
汎濫，其如之何乎。鄭之亂，君實使之。故曰：淫風大行，
莫之能救焉。嗚呼！序之脩，辭其周到精確，不易窺爾。
問者曰：所謂兵革，何必公子。予曰：前篇不云乎。公子
五爭，兵革不息，男女相棄。茲省一句，而意則通文之
貫也。夫既其文，未既其實，猶曰不可。文且不既，去實
遠矣。是以說者不求文之實，而以相棄生於亂離已
雖通乎未也。

古序翼卷三終

...

Faint vertical text columns in the right margin, likely bleed-through from the reverse side of the page.

Handwritten marks or bleed-through on the left side of the page.

